

Hoh Cibgouj Daih Ciuhai

祝贺十九大召开

□ Suh Dasingh / 苏大星

Cib nyied vagut hai
Dujduj gvai youh angj
Cunghgoz Gungcanjdangj
Angq hai Cibgouj Daih

Baekging cang ndaej gyaeu
Soujduh raeuz nauhyied
Ndwen neix caen daegbied
Yied daeuj yied angqfaengz

Daibyauij comz haihoih
Gyoengqdoi hwnh saehcingz
Ei Cunghgoz guekcingz
Dingh lusen fuengcim

Cibgouj Daih baugau
Neiyungz sau youh naek
Faensik naeuz ndaej laeg
Miz daegsaek gangj coenz

Cibbet Daih doxma
Guekgya fazcanj vaiq
Gaijgwz yamq ndaej daih
Caez byaij hwnj mbaek sang

Cunghyangh veh lamzdoz
Raeuz ei soh baenaj
Rap naek dawz gwnz mbaq
Byaij gvaq loh fukhwng

Ceih guek sien ceih dangj
Gangj daeuj couh dwg yiemz
Gvej haeux yungh fagliemz
Diem ma mbouj miz rangh

Fanjfuj youq gwnz loh
Wnggai mbouj rox dingz
Giemq gat mbouj nyaenx cingz
Boux famh dingh ngaiz faeg

Laeb fazci guekgya
Banh saeh aeu fap ei
Bouxbox gangj dauhleix
Sevei engq vwnzmingz

Gij “it sai it loh”
Gak guek coh camgya
Caemhcaez okrengz ma
Daihgya cungj ndaej leih

Gungcanjdangj laeb daeuj
Cungj vih raeuz yinx roen
Ronghsag lumj daengngoenz
Coenzvah danq mbouj caenh

Cibgouj Daih ciuhai
Byai faex langh va moq
Caemhcaez daeuj goenghoh
Cunghgoz angjda doh

Geijcib Bi Maqmuengh, Ndaej Nduen Lumj Fangzhwnz

几十年希冀，如愿似梦中

□ Veiz Vwnzgauh / 韦文高

Ndaej saw Sawcuengh ma
Lumj bya faengz raemx moq
Gou cug ranz cug hoh
Bae gangjgoj damz sim

Dwen gaijgwz hailangh
Angq gangj hag Sawcuengh
Vih vunzmbanj beixnuengx
Yungh Sawcuengh saujmangz

Gyoengq beixnuengx gig maez
Caezgya daeuj bauqmingz
86 nienz cingmingz
Gou cingqsik haiban

Vunz yied daeuj yied lai
Mbouj miz daiz miz daengq
Ranz gaeb fouz dieg naengh
Doxcaenx doxbaengx daeuj

Mbouj dwg boq daihvah
Yah gou caen dwg ndei
Bak rwix sim goj gyaenz
Bang gou caez ok geiq

Heuh gou ninz ranzmou
De bau souj ranzvaiz
Gyoengq lwgbawx lan gvai
Ninz baihsuwx ranzsaec

Doenq ok song gan rug
Daeuj dang guh gyausiz
Dawz gij benj doq mih

Guh daiz iq daengq iq

Ban dou couh yienghneix
Ndaej swnhleih hwnjdangz
Mbouj lumz yah gou bang
Ndang raeuj ndawsim diemz

Ranz miz noh dem noh
Dujva ndoq youh hai
Ban vunz lai dem lai
Vunz baihrog youh daeuj

Faen 3 geiz 3 ban
Hanh 3 haemh doxlwnz
It ndwen 10 haemh dwnx
40 vunz hwnjroengz

Minzyijban damq rox
It loh roengzdaeuj caz
Caen saedsaeh mbouj gyaj
Baihlay gag hai ban

Ciheiz gujli dou
Soengq saw mbouj aeu ngaenz
Daeuj niemhsou mwhhaenx
Bingzyaenz 80 faen

Ndawsim gou haengjheiq
Caiq siengj han geij geiz
Byawz rox mingh mbouj ndei
Ndang ndaej bingh laemx roengz

Geijcib bi gvaqdaeuj



Dahsau cat haeuxcid swiq rongfaengx gvaq ciet.

Vuz Swnghbinh ingj

Mbouj aeu beg sai rengz
Gyoengq zozyenz doxceng
Lenghlengh yunghsim hag

Gonq mbouj rox sij saenq
Seizneix gaenq mbouj you
Geiq vah raeuz souyouz
Mbouj caiq gouz bouxwnq

Yawj saw menh ndaej rox
Gohyoz ciengx ndaem gaenq
Mbouj caiq bae maezsaenq
Neix gaenx guh fatcaiz

Daegbied song hauxseng
Roengzrengz ceng hag ndei
Baengh Sawcuengh gauj ndaej

Ndaej bae doeg cunghconh

Daengz bizyez dauqma
Ndaej camgya gunghcoz
Caez caemh byaij diuz loh
Guen sang mbouj doxdoengz

Seizneix gou gaenq laux
Byoemgyaeuj hau mumh roz
Naj nyaueq da hix myox
Gag rox ngeix ndawsim

Geijcib bi gumzgamx
Amq fangzhwnz Sawcuengh
Geijcib bi maqmuengh
Ndaej nduen vuengz fangzhwnz
(sat)